

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI RABU, 25 NOVEMBER 2015, PUKUL 10.00 PAGI

Bil. 56

PERTANYAAN-PERTANYAAN BAGI JAWAB LISAN

1. PR-1333-L71568
Tuan Haji Mohd Fasih bin Haji Mohd Fakeh [Sabak Bernam] minta **MENTERI TENAGA, TEKNOLOGI HIJAU DAN AIR** menyatakan apakah langkah Kerajaan bagi meningkatkan jumlah kapasiti tenaga boleh diperbaharui dalam penjanaan dan nyatakan sejauh manakah komitmen sektor awam dan swasta serta industri dan orang awam dalam meningkatkan jumlah tenaga boleh diperbaharui.
2. PR-1333-L71413
Tuan Ahmad Baihaki bin Atiqullah [Kubang Kerian] minta **MENTERI SUMBER ASLI DAN ALAM SEKITAR** menyatakan berapakah kos menyewa dan menyara hidup sepasang panda Fu Wa dan Feng Yi semenjak ia didatangkan daripada Negara China, sehingga lahirnya anak yang baru, dan apakah faedah langsung yang diperoleh oleh rakyat Malaysia.
3. PR-1333-L69566
Datuk Sapawi bin Ahmad Wasali [Sipitang] minta **MENTERI DALAM NEGERI** menyatakan langkah jangka panjang membanteras kegiatan perjudian haram, termasuk menerusi online dan kafe siber bagi mengelak generasi muda terjebak kegiatan tersebut.
4. PR-1333-L69776
Puan Siti Zailah binti Mohd Yusoff [Rantau Panjang] minta **MENTERI KEWANGAN** menyatakan secara terperinci kedudukan terkini isu 1MDB dan apakah penyelesaian jangka pendek dan jangka panjang supaya hutang 1MDB tidak terus membebankan negara.

5. PR-1333-L70314
Tuan Che Mohamad Zulkifly bin Jusoh [Setiu] minta **MENTERI PEMBANGUNAN WANITA, KELUARGA DAN MASYARAKAT** menyatakan sejauh manakah dakwaan terdapat pengusaha TASKA yang mengambil warga asing sebagai pengasuh di negara ini, serta adakah terdapat tindakan undang-undang yang diambil terhadap pengusaha TASKA berhubung isu tersebut.
6. PR-1333-L70403
Tan Sri Dato' Seri Abd Khalid bin Ibrahim [Bandar Tun Razak] minta **MENTERI WILAYAH PERSEKUTUAN** menyatakan statistik penjaja dan peniaga kecil warganegara Malaysia yang beroperasi tanpa lesen di Wilayah Persekutuan Kuala Lumpur serta pelan tindakan untuk mempertingkatkan kemudahan kepada mereka termasuk infrastruktur, peralatan dan kelengkapan, bantuan kewangan, pengetahuan, permit perniagaan dan lesen lain.
7. PR-1333-L69510
Dato' Wira Othman bin Abdul [Pendang] minta **MENTERI PERDAGANGAN ANTARABANGSA DAN INDUSTRI** menyatakan berapa jumlah hasil eksport negara sehingga bulan September 2015 berbanding dengan tahun 2014. Apakah Kerajaan bercadang untuk meneroka pasaran baru untuk eksport negara.
8. PR-1333-L70896
Dr. Lee Boon Chye [Gopeng] minta **MENTERI KESIHATAN** menyatakan kedudukan pelaksanaan pelalian HPV.
9. PR-1333-L70798
Puan Rubiah binti Haji Wang [Kota Samarahan] minta **MENTERI PEMBANGUNAN WANITA, KELUARGA DAN MASYARAKAT** menyatakan langkah efektif Kerajaan menangani masalah moral masyarakat masa kini.
10. PR-1333-L70164
Tuan Idris bin Haji Ahmad [Bukit Gantang] minta **MENTERI PENDIDIKAN** menyatakan apakah kriteria yang ditentukan untuk guru ganti apabila guru sekolah tersebut cuti bersalin, menunaikan haji dan cuti tanpa gaji bagi memastikan guru ganti tersebut mampu mengajar subjek dan menamatkan silibus yang ditinggalkan oleh guru yang bercuti.
11. PR-1333-L69739
Dato Sri Dr. Muhammad Leo Michael Toyad Abdullah [Mukah] minta **MENTERI PERUSAHAAN PERLADANGAN DAN KOMODITI** menyatakan apakah langkah Kerajaan dalam usaha menjaga kepentingan pekebun-pekebun getah di luar bandar.
12. PR-1333-L71252
Tuan Oscar Ling Chai Yew [Sibu] minta **MENTERI PENDIDIKAN** menyatakan adakah kandungan buku teks darjah 4 dan 5 akan disusun semula supaya 1963 Hari Penubuhan Malaysia akan dimasukkan. Mengapa Hari Malaysia tidak dipandang dengan serius oleh Kerajaan Persekutuan, ia hanya diumumkan sebagai hari cuti selepas 2009.

13. PR-1333-L69714
Dato' Haji Mohd Zaim bin Abu Hasan [Parit] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan statistik peniaga yang telah didakwa di bawah Akta Kawalan Harga dan Anti Pencatutan 2011 semenjak dasar GST diperkenalkan.
14. PR-1333-L70430
Tuan Lim Lip Eng [Segambut] minta **PERDANA MENTERI** menyatakan nama jawatan, tugas yang diberi, gaji dan elaun bagi Lim Kok Wing sebelum beliau letak jawatan, Heng Seai Kie dan Paul Stadlen.
15. PR-1333-L70703
Datuk Seri Noh bin Haji Omar [Tanjong Karang] minta **PERDANA MENTERI** menyatakan berapa ramai pengundi berdaftar yang berumur lebih 100 tahun yang keluar mengundi pada PRU-13 mengikut pecahan kaum.
16. PR-1333-L69960
Dato' Seri Dr. Wan Azizah binti Wan Ismail [Permatang Pauh] minta **PERDANA MENTERI** menyatakan laporan mengenai kedudukan maruah Melayu yang dikatakan tercabar. Nyatakan perangkaan kedudukan tanah-tanah rizab Melayu yang ditukar status, nisbah bilangan kakitangan awam Melayu dan ekulti ekonomi Melayu yang berpindah milik.
17. PR-1333-L70582
Tuan Anyi Ngau [Baram] minta **MENTERI PENDIDIKAN** menyatakan apakah usaha terbaru yang sedang dan akan dilaksanakan pihak Kementerian di dalam menambah baik bangunan kuarters dan bilik darjah usang sekolah-sekolah di kawasan Parlimen Baram khususnya di SMK Long Lama, SMK Temenggong Datuk Lawai Jau, SMK Bakong, SK Long Moh, SK Long Miri, SK Pengelayan, SK Long Pillah, SK Long Aton dan SK Long Teru Tinjar.
18. PR-1333-L70137
Ust. Datuk Dr. Mohd. Khairuddin bin Aman Razali [Kuala Nerus] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan perkembangan semasa projek pembinaan Pusat Pentadbiran Daerah Kuala Nerus dan penyediaan keseluruhan prasarana di daerah tersebut.
19. PR-1333-L70701
Tuan Haji Hasbi bin Haji Habibollah [Limbang] minta **MENTERI DALAM NEGERI** menyatakan bolehkah Kerajaan berunding dengan Kerajaan Negara Brunei untuk membuka sebuah CIQ baru di Pandam, Limbang, Sarawak (Malaysia) dan Lumapas (Brunei) sebagai laluan masuk kedua di antara Limbang dan Bandar Seri Begawan kerana pembinaan jambatan melintasi Sungai Limbang akan bermula pada awal tahun 2016.
20. PR-1333-L71360
Tuan Ignatius Dorell Leiking [Penampang] minta **MENTERI DALAM NEGERI** menyatakan adakah pihak Kerajaan Persekutuan Malaysia telah menyerahkan (*surrender*) seorang banduan di Sabah yang dikenali sebagai Manuel Amalilio kepada pihak Kerajaan Filipina.

21. PR-1333-L70851
Dato' Hasan bin Arifin [Rompin] minta **MENTERI PERTANIAN DAN INDUSTRI ASAS TANI** menyatakan kesan Perjanjian Perkongsian Trans Pasifik (TPPA) kepada sektor pertanian negara ini kerana menerusi perjanjian ini produk daripada Amerika akan menjadi sangat murah apabila dipasarkan ke dalam negara disebabkan sektor pertanian mereka menerima subsidi yang sangat tinggi berbanding negara kita.
22. PR-1333-L70825
Tuan Julian Tan Kok Ping [Stampin] minta **MENTERI DALAM NEGERI** menyatakan adakah biometrik sistem digunakan di sepanjang sempadan Sarawak-Kalimantan. Jumlah kos perbelanjaan serta pengendalian sistem tersebut. Senaraikan syarikat yang terlibat serta agensi Kerajaan manakah yang mempunyai akses terhadap data tersebut.
23. PR-1333-L69669
Datuk Juslie bin Ajirol [Libaran] minta **PERDANA MENTERI** menyatakan senarai pembangunan yang telah dan sedang dinikmati etnik di negeri Sabah sejak pembentukan Malaysia, 52 tahun lalu.
24. PR-1333-L71170
Tuan Ahmad Marzuk bin Shaary [Bachok] minta **MENTERI TENAGA, TEKNOLOGI HIJAU DAN AIR** menyatakan apakah jaminan pembinaan empangan Lebir dan Nenggiri di Kelantan tidak melebihi RM3 bilion sebagaimana yang telah diumumkan. Nyatakan senarai empangan yang telah dibina melebihi kos asal pembinaan.
25. PR-1333-L69706
Datuk Dr. Ewon Ebin [Ranau] minta **PERDANA MENTERI** menyatakan apakah jenis-jenis insentif-insentif dalam RMK-11 yang disediakan oleh pihak Kerajaan bagi membantu dan memacu masyarakat Bumiputera minoriti di negeri Sabah, agar agenda pemerkasaan ekonomi Bumiputera dapat dicapai menjelang tahun 2020.
26. PR-1333-L69987
Dato' Dr. Mujahid Yusof Rawa [Parit Buntar] minta **MENTERI KEWANGAN** menyatakan kesan dari isu 1MDB terhadap dasar-dasar fiskal negara.
27. PR-1333-L70635
Datuk Haji Datu Nasrun bin Datu Mansur [Silam] minta **MENTERI LUAR NEGERI** menyatakan kerjasama antara Negara ASEAN dalam menghadapi ancaman transnasional seperti penyeludupan, kegiatan lanun dan terrorisme.
28. PR-1333-L71202
Tuan Mohd Rafizi bin Ramli [Pandan] minta **MENTERI PENDIDIKAN TINGGI** menyatakan senaraikan maklumat kewangan PTPTN (pinjaman diberikan, jumlah peminjam, bayaran balik dikutip dan baki hutang PTPTN dengan pemiutang) bagi tahun 2010 hingga 2014 dan unjuran yang sama bagi tahun 2015 hingga 2025.

29. PR-1333-L70374
Tan Sri Datuk Seri Panglima Joseph Pairin Kitingan [Keningau] minta **MENTERI KEMAJUAN LUAR BANDAR DAN WILAYAH** menyatakan bilakah pembinaan Bangunan Maktab Rendah Sains MARA di daerah Keningau di lokasi Kampung Pagansangon Jalan Apin-Apin Keningau akan dibina memandangkan kelulusan ini telah diumumkan pada tahun 2012.
30. PR-1333-L71164
Tuan Hee Loy Sian [Petaling Jaya Selatan] minta **MENTERI DALAM NEGERI** menyatakan hasil siasatan terhadap individu yang terlibat dalam Himpunan Merah atau Himpunan Melayu Bersatu yang jelas membangkitkan isu perkauman seperti mendesak penutupan SJK (C) dan menghalau kaum Cina dengan kata-kata Cina balik tongsan.
31. PR-1333-L70961
Dato' Ar. Wan Mohammad Khair-il Anuar bin Wan Ahmad [Kuala Kangsar] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan Khazanah Research Institute menjelaskan bahawa harga rumah di Malaysia masih lagi belum mencapai kadar mampu milik. Apakah perancangan Kerajaan dari segi pembentukan polisi untuk membolehkan harga rumah turun kepada kadar mampu milik.
32. PR-1333-L70100
Tuan Nik Mohamad Abduh bin Nik Abdul Aziz [Pasir Mas] minta **MENTERI BELIA DAN SUKAN** menyatakan adakah Kementerian bercadang membentuk suatu institusi sains sukan khusus bagi pembangunan sukan bola sepak negara
33. PR-1333-L70043
Tuan Er Teck Hwa [Bakri] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan bilangan pengagihan rumah kos sederhana dan rendah di bawah KMK dari tahun 2008 sehingga 2014 mengikut daerah di negeri Johor. Senaraikan jumlah permohonan rumah yang diperolehi dari laman web PR1MA sejak tahun 2014 di negeri Johor.
34. PR-1333-L71562
Dr. Mansor bin Abd Rahman [Sik] minta **MENTERI PENDIDIKAN** menyatakan apakah kriteria yang ditetapkan dalam pengambilan guru-guru Bahasa Inggeris yang didatangkan dari negara-negara luar memandangkan terdapat sebahagian guru-guru tersebut bukanlah bertugas sebagai guru di negara asal dan sejauh manakah keberkesanan dalam penguasaan Bahasa Inggeris di sekolah-sekolah yang mempunyai tenaga pengajar tersebut.
35. PR-1333-L71591
Puan Nurul Izzah binti Anwar [Lembah Pantai] minta **MENTERI KEWANGAN** menyatakan apakah rasional Kerajaan tidak meletakkan kesemua ubat-ubatan dan perkhidmatan perubatan dalam senarai barangan dan perkhidmatan berkadar sifar di bawah rejim GST dan berapakah kadar kenaikan kos perkhidmatan perubatan dan ubat-ubatan sejak pelaksanaan GST.

36. PR-1333-L70666
Dr. Haji Izani bin Haji Husin [Pengkalan Chepa] minta **MENTERI PERTANIAN DAN INDUSTRI ASAS TANI** menyatakan jumlah (tan per tahun) keperluan daging negara mengikut negeri dan berapa peratuskah sasaran dicapai.
37. PR-1333-L71223
Tuan Haji Ahmad Lai bin Bujang [Sibuti] minta **MENTERI BELIA DAN SUKAN** menyatakan apakah cadangan Kementerian untuk meningkatkan minat di kalangan belia untuk mempelajari asas kemahiran berenang bagi meningkatkan kemahiran *survival* belia dan menjadi aktiviti berenang sebagai aktiviti sukan yang sihat dan selamat.
38. PR-1333-L70210
Dato' Ngeh Koo Ham [Beruas] minta **MENTERI TENAGA, TEKNOLOGI HIJAU DAN AIR** menyatakan kenapa tarif elektrik Tenaga Nasional Berhad (TNB) tidak turun sungguhpun harga bahan api (petroleum, gas dan arang batu) yang digunakan untuk menjana elektrik telah turun mendadak di antara 40% - 70% jika dibandingkan dengan harga bahan api apabila TNB menaikkan tarif elektrik pada kali yang terakhir.
39. PR-1333-L70822
Datuk Aaron Ago anak Dagang [Kanowit] minta **MENTERI PENDIDIKAN** menyatakan keperluan Sekolah Vokasional & Pusat Latihan Teknikal dan pengambilan tahunan pelajar (*trainee*) untuk mengisi atau memenuhi keperluan negara supaya kita tidak bergantung kepada tenaga mahir dari luar negara.
40. PR-1333-L70844
Tuan Nga Kor Ming [Taiping] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan setakat 15 September 2015, berapakah unit rumah mampu milik, telah dibina dan akan dibina oleh Kerajaan Persekutuan mengikut nama-nama negeri masing-masing.
41. PR-1333-L70387
Dato' Haji Abdul Rahman bin Haji Mohamad [Lipis] minta **MENTERI PENDIDIKAN** menyatakan penambahbaikan Kementerian bagi pelaksanaan Ujian Penilaian Sekolah Rendah (UPSR) pada tahun 2016.
42. PR-1333-L71315
Dato' Noraini binti Ahmad [Parit Sulong] minta **MENTERI KEMAJUAN LUAR BANDAR DAN WILAYAH** menyatakan adakah langkah-langkah terkini Kementerian untuk membantu pekebun-pekebun kecil getah berdepan dengan kesan kejatuhan harga getah dunia ketika ini selain daripada menggalakkan tanaman dan ternakan sampling di kebun-kebun kecil getah.
43. PR-1333-L69886
Datuk Dr. Makin @ Marcus Mojigoh [Putatan] minta **PERDANA MENTERI** menyatakan keputusan yang telah diambil oleh pihak Kerajaan ke atas cadangan bagi memperuntukkan kuota menunaikan ibadah Haji bagi kawasan Parlimen.

44. PR-1333-L70990
Tuan Ramkarpal Singh a/l Karpal Singh [Bukit Gelugor] minta **PERDANA MENTERI** menyatakan pendirian terkini Kerajaan berkenaan sama ada hukuman mati mandatori yang masih diamalkan di Malaysia akan dihapuskan dan digantikan dengan hukuman yang lebih berperikemanusiaan.
45. PR-1333-L70778
Datuk Rozman bin Isli [Labuan] minta **MENTERI KESIHATAN** menyatakan adakah Kerajaan bersedia untuk menempatkan doktor pakar kanak-kanak dan E.N.T di Labuan bagi menangani permasalahan perubatan berkaitan yang kini menjadi rungutan ramai penduduk Labuan.
46. PR-1333-L70036
Datuk Wilson Ugak Kumbong [Hulu Rajang] minta **MENTERI DALAM NEGERI** menyatakan sekiranya pihak Kementerian ada cadangan untuk membina sebuah balai polis di BRS Sungai Asap, Belaga.
47. PR-1333-L70856
Tuan Chong Chieng Jen [Bandar Kuching] minta **MENTERI KEWANGAN** menyatakan setakat 30-9-2015, apakah perbezaan hasil sebenar yang dikutip oleh Kerajaan daripada pengeluaran minyak berbanding dengan hasil anggaran itu yang dibuat dalam bajet 2015, khususnya akibat daripada penurunan harga minyak antarabangsa.
48. PR-1333-L71096
Tuan Teo Kok Seong [Rasah] minta **MENTERI KEWANGAN** menyatakan :-
- (a) mengapakah Insurans Takaful Berkelompok Insurans 1Malaysia atau i-BR1M telah diganti dengan ditukar kepada Skim Khairat Kematian (SKK) tanpa memaklumkan kepada semua penerima BRIM; dan
 - (b) berapakah kos yang ditanggung oleh Kerajaan Pusat untuk menggantikan Insurans Takaful Berkelompok Insurans 1Malaysia atau i-BR1M kepada Skim Khairat Kematian (SKK).
49. PR-1333-L69809
Dato' Haji Mahfuz bin Omar [Pokok Sena] minta **PERDANA MENTERI** menyatakan apa keperluan dan perkiraan yang dibuat dengan jumlah 24 Kementerian dan 35 anggota Jemaah Menteri yang begitu ramai berbanding dengan jumlah anggota kabinet di negara maju dan negara membangun.
50. PR-1333-L71466
Tuan Sim Chee Keong [Bukit Mertajam] minta **MENTERI DALAM NEGERI** menyatakan status tiga serta peranan tiga syarikat mendaftar warga asing iaitu NERS Sdn. Bhd., MyEG Services Bhd. dan Real Time Networking Sdn. Bhd. Apa perbezaan perkhidmatan syarikat tersebut.
51. PR-1333-L70807
Tuan Gobind Singh Deo [Puchong] minta **MENTERI DALAM NEGERI** menyatakan status siasatan Repot-Repot no. Kundang/002026/15, Kundangan/002027/15 dan Mentakab/004098/11.

52. PR-1333-L69913
Dato' Dr. Tan Kee Kwong [Wangsa Maju] minta **MENTERI KEWANGAN** menyatakan jumlah sebenar hutang 1MDB.
53. PR-1333-L70543
Tuan Sim Tze Tzin [Bayan Baru] minta **MENTERI PENGANGKUTAN** menyatakan mengapa pihak kementerian bersetuju atau tidak bersetuju perubahan Pelan Induk KLIA oleh MAHB yang memindah tapak KLIA2 dari utara ke barat. Apakah justifikasi perubahan reka bentuk dari *finger concept* kepada *satelit concept*.
54. PR-1333-L69597
Dato' Abdul Manan bin Ismail [Paya Besar] minta **MENTERI KEWANGAN** menyatakan syarikat dan konsortium yang telah disenarai pendek dan diluluskan oleh 1Malaysia Development Bhd. (1MDB) sebagai rakan pembangunan berpotensi dalam projek Bandar Malaysia seluas 196 hektar.
55. PR-1333-L71110
Tuan Jeff Ooi Chuan Aun [Jelutong] minta **PERDANA MENTERI** menyatakan kenapa, demi mempertahankan maruah negara, masih belum bertindak untuk menyaman Wall Street Journal yang mendakwa pada Julai 2015 bahawa sebanyak US\$700 juta telah dimasukkan ke dalam akaun peribadi Perdana Menteri tanpa dikenali sumber pemberi dan tujuan kegunaannya.
56. PR-1333-L70294
Dato' Mohd Ariff Sabri bin Abdul Aziz [Raub] minta **PERDANA MENTERI** menyatakan :-
- (a) bolehkah negeri Johor berpisah dari Malaysia; dan
 - (b) adakah kenyataan yang membayangkan keinginan keluar Malaysia dianggap menghasut (*sedition*) atau khianat (*treasonous*) dan jika ya, apakah tindakan yang Kerajaan mahu ambil.

PADA PERMULAAN URUSAN MESYUARAT
MENGEMUKAKAN RANG UNDANG-UNDANG KERAJAAN
UNTUK BACAAN KALI YANG PERTAMA

1. **Menteri Dalam Negeri**

- * Rang Undang-undang Dadah Berbahaya (Langkah-Langkah Pencegahan Khas) (Pindaan) 2015.

* Menandakan bahawa Rang Undang-undang ini akan dibawa pada semua peringkat di mesyuarat ini.

ATURAN URUSAN MESYUARAT DAN USUL-USUL

1. **Menyambung semula pertimbangan ke atas Rang Undang-undang Perbekalan 2016 (D.R. 31/2015) dan Usul Anggaran Perbelanjaan Pembangunan 2016 seperti berikut :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh dua bilion ringgit (RM52,000,000,000) dibelanjakan daripada Kumpulan Wang Pembangunan bagi tahun 2016, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2016, yang dibentangkan sebagai Kertas Perintah 42 Tahun 2015, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

Dalam Jawatankuasa Sebuah-buah Majlis (24 November, 2015)

2. **Menteri di Jabatan Perdana Menteri akan mencadangkan :**

“ **BAHAWA** Majlis mengambil maklum berkenaan peristiwa pencerobohan bersenjata di Kampung Tanduo, Lahad Datu pada 12 Februari 2013 oleh kumpulan yang dikenal pasti sebagai pengikut Jamalul Kiram III bagi merampas wilayah di pantai timur Sabah.

BAHAWA pencerobohan kumpulan tersebut ternyata telah mencabar kedaulatan Negara dan telah mengakibatkan kehilangan nyawa anggota keselamatan Negara.

BAHAWA sebagaimana yang telah dilaporkan di laman media sosial dan gambar yang dimuat naik oleh Puteri Jacel Kiram pada 9 November 2015, Yang Berhormat Lembah Pantai telah menghadiri pertemuan bersama dengan Puteri Jacel Kiram yang merupakan anak kepada Jamalul Kiram III.

BAHAWA Yang Berhormat Lembah Pantai sedia maklum bahawa Puteri Jacel Kiram menentang kedudukan Sabah sebagai sebahagian daripada Negara Malaysia dan sehingga kini masih menuntut negeri Sabah adalah milik Kesultanan Sulu.

BAHAWA pertemuan Yang Berhormat Lembah Pantai dan Puteri Jacel Kiram tersebut menimbulkan prasangka negatif dan tidak sensitif terhadap peristiwa pencerobohan Lahad Datu yang telah mencabar kedaulatan Negara.

BAHAWA pertemuan Yang Berhormat Lembah Pantai bersama dengan anak kepada dalam pencerobohan Negara telah dilihat bertentangan dengan angkat sumpah sebagai ahli Parlimen dan sumpah setia beliau kepada Malaysia yang telah berikrar untuk menumpahkan taat setia yang sebenar kepada Malaysia, memelihara, melindungi dan mempertahankan Perlembagaannya.

DAN BAHAWA tindakan Yang Berhormat Lembah Pantai tersebut merupakan suatu penghinaan kepada Majlis Mesyuarat yang turut mencemarkan nama baik dan prestij Dewan Rakyat.

MAKA inilah dipersetujui Yang Berhormat Lembah Pantai hendaklah dirujuk kepada Jawatankuasa Hak dan Kebebasan ”.

- | | | | |
|----|----------------|---|-----------------------------------|
| 3. | (D.R. 32/2015) | Rang Undang-undang Kewangan 2015 | Bacaan Kali Yang Kedua |
| | | [Menteri Kewangan] | |
| 4. | (D.R. 28/2015) | Rang Undang-undang Perbadanan Insurans Deposit Malaysia (Pindaan) 2015 - Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (22 Oktober 2015) | |
| | | [Menteri Kewangan] | |
| 5. | (D.R. 30/2015) | Rang Undang-undang Syarikat 2015 | Bacaan Kali Yang Kedua |
| | | [Menteri Perdagangan Dalam Negeri, Koperasi dan Kepenggunaan] | |
| 6. | (D.R. 29/2015) | Rang Undang-undang Skim Kepentingan 2015. | “ |
| | | [Menteri Perdagangan Dalam Negeri, Koperasi dan Kepenggunaan] | |
| 7. | (D.R 33/2015) | Rang Undang-undang Tabung Angkatan Tentera (Pindaan) 2015 | “ |
| | | [Menteri Pertahanan] | |
| 8. | (D.R. 9/2015) | Rang Undang-undang Kanun Tatacara Jenayah (Pindaan) 2015 | “ |
| | | [Menteri di Jabatan Perdana Menteri] | |
| 9. | (D.R. 12/2015) | Rang Undang-undang Keterangan (Pindaan) 2015 | “ |
| | | [Menteri di Jabatan Perdana Menteri] | |

10. (D.R. 24/2014) Rang Undang-undang Dadah Berbahaya “
(Pindaan) (No. 2) 2014

[Menteri Kesihatan]

11. PR-1333-U69963

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini. Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah kebanjiran pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang mengelarkan diri mereka sebagai SSKM ini.”

[Menteri Dalam Negeri]

12. PR-1333-U69964

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat rungutan-rungutan dikalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini. Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini."

[Perdana Menteri]

13. PR-1333-U69965

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini."

[Menteri Pertanian dan Industri Asas Tani]

14. PR-1333-U69966

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehpercayaan rakyat kepada Kerajaan masa kini.”

[Menteri Kewangan]

15. PR-1333-U70485

Tuan Ng Wei Aik [Tanjong] akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbau perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

[Menteri Dalam Negeri]

16. PR-1333-U70272

Tuan M. Kulasegaran [Ipoh Barat] akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

[Perdana Menteri]

17. PR-1333-U70255

Dr. Tan Seng Giaw [Kepong] akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

[Menteri Kewangan]

18. PR-1333-U70256

Dr. Tan Seng Giaw [Kepong] akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau in.”

[Menteri Sumber Asli dan Alam Sekitar]

19. PR-1333-U71552

Tuan Fong Kui Lun [Bukit Bintang] akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

[Perdana Menteri]

20. PR-1333-U71553

Tuan Fong Kui Lun [Bukit Bintang] akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

[Menteri Kesejahteraan Bandar, Perumahan dan Kerajaan Tempatan]

21. PR-1333-U69805

Dato' Kamarudin bin Jaffar [Tumpat] akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

[Perdana Menteri]

22. PR-1333-U69806

Dato' Kamarudin bin Jaffar [Tumpat] akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

[Perdana Menteri]

23. PR-1333-U69807

Dato' Kamarudin bin Jaffar [Tumpat] akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatgandakan usaha pembinaan rumah-rumah tersebut.”

[Perdana Menteri]

24. PR-1333-U70769

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina, Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara. BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab.

Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

[Perdana Menteri]

25. PR-1333-U70770

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa posters dan banners tertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Tetak Cina. Umno perlukan anda”. Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

[Perdana Menteri]

26. PR-1333-U70772

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

[Menteri Kesihatan]

27. PR-1333-U70774

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakkan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

[Menteri Belia dan Sukan]

28. PR-1333-U70776

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

[Menteri Dalam Negeri]

29. PR-1333-U70806

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan

arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

[Menteri Kesejahteraan Bandar, Perumahan dan Kerajaan Tempatan]

30. PR-1333-U70808

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

[Menteri Dalam Negeri]

31. PR-1333-U70809

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]

32. **Dato’ Seri Dr. Wan Azizah binti Wan Ismail [Permatang Pauh]** akan mencadangkan :-

“Bahawa Dewan ini tidak ada kepercayaan terhadap Yang Amat Berhormat Pekan Dato’ Seri Najib Tun Razak sebagai Perdana Menteri Malaysia.”

[Perdana Menteri]

33. **Tuan Gobind Singh Deo [Puchong]** akan mencadangkan :-

“Bahawa mengikut Peraturan Mesyuarat 43 dibaca bersama Peraturan Mesyuarat 99 Peraturan-Peraturan Majlis Mesyuarat Dewan Rakyat, Dewan Yang Mulia ini mengkaji semula dan mengenepikan keputusan Yang di-Pertua YB Dato Seri Dr. Ronald Kiandee, yang membenarkan usul untuk menggantung Yang Berhormat Tuan Lim Kit Siang, Ahli Parlimen Gelang Patah daripada Perkhidmatan sebagai Ahli Parlimen selama 6 bulan dibahas tanpa rujukan dibuat kepada Jawatankuasa Hak dan Kebebasan sepertimana menurut Peraturan 80A Peraturan-Peraturan Majlis Mesyuarat.”

[Perdana Menteri]

34. **Tuan Mohd Rafizi bin Ramli [Pandan]** akan mencadangkan :-

“Bahawa Dewan ini menggesa supaya Tenaga Nasional Berhad hanya membayar jumlah yang sepadan dengan nilai pasaran aset-aset *Independent Power Producers* (IPP) yang dimiliki oleh 1MDB dan Dewan berpendapat bahawa harga siling mengikut nilai pasaran bagi aset-aset itu adalah Ringgit Malaysia Lapan Bilion (RM8,000,000,000) sahaja”.

[Menteri Kewangan]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

| <u>TAHUN 2015</u> | <u>RISALAT/DOKUMEN</u> | <u>TARIKH DIBENTANGKAN</u> |
|------------------------------|--|---------------------------------------|
| ST.107 | Laporan Tahunan dan Penyata Kewangan Perbadanan Pembangunan Kampong Bharu Bagi Tahun 2014. | 25 November 2015 |
| ST.108 | Laporan Tahunan dan Penyata Kewangan Agensi Kelayakan Malaysia (MQA) Bagi Tahun 2014 | 25 November 2015 |
| ST.111 | Laporan Tahunan dan Penyata Kewangan Yayasan Laporan Kewangan (FRF) Bagi Tahun 2014. | 25 November 2015 |
| ST.131 | Laporan Tahunan dan Penyata Kewangan Majlis Agama Islam Wilayah Persekutuan (MAIWP) Bagi Tahun 2014. | 25 November 2015 |
| ST.147 | Laporan Tahunan dan Penyata Kewangan Akademi Seni Budaya dan Warisan Kebangsaan (ASWARA) Bagi Tahun 2014 | 25 November 2015 |